

仲秋之夕客有叩門指雲物而告予曰海氣甚
惡非禳非禱斷霓飲海而北指赤雲夾日而南
翔此颶之漸也子盍備之語未卒庭戶肅然槁
葉蔌蔌驚鳥疾呼怖獸碎易忽野馬之決驟矯
退飛之六鷁襲土囊而暴怒掠衆竅之叱吸予
入室而坐斂衽變色客曰未也此颶之先驅爾
少焉排戶破牖損瓦辟屋礮擊巨石揉拔喬木
勢翻渤澥響振坤軸疑屏醫之赫怒執陽侯而
將戮鼓千尺之洪濤翻百仞之陵谷吞泥沙於

一卷落崩崖於再觸列萬馬而並鴛潰千車而
爭逐虎豹訾駭鯨鯢犇蹙類鉅鹿之戰殺聲呼
之動地似昆陽之役舉百萬于一覆予亦爲之
股慄毛聳宗氣側足夜拊榻而九徙晝命龜而
三卜蓋三日而後息也父老來嗜酒漿羅列勞
來童僕懼定而說理草木之旣偃葺軒楹之已
折補茆茨之罅漏塞牆垣之頽缺已而山林寂
然海波不興動者自止鳴者自停湛天宇之蒼
蒼流孤月之熒熒忽悟且嘆莫知所營嗚呼大

小出於相形憂喜因於所遇昔之飄然者若爲
巨耶吹萬不同果足怖耶蟻之緣也噓則墜蚋
之集也呵則舉夫噓阿曾不能以振物而施之
二蟲則甚懼鵬水擊而三千搏扶搖而九萬彼
視吾之惴慄亦爾汝之相莞均大塊之噫氣奚
巨細之足辨陋耳目之不廣爲外物之所變且
夫萬象起滅衆怪耀眩求髣髴於過耳視空中
之飛電則向之所謂可懼者實耶虛耶惜吾知
之晚也

白雲照春海賦

姜公輔

唐平章
郡人

以碧鮮空鏡春海爲韻

白雲溶溶搖曳乎春海之中紛紛層漢皎潔長
空細影參差匝微明於日域輕文燐亂分炯晃
於仙宮始而乾門闕陽光積乃縹緲以從龍遂
輕盈而拂石出窮巒以高翥跨橫海而遠撫故
海映雲而自春雲照海而生白或杲杲以積素
或沉沉以凝碧圓虛乍啟均瑞色而周流蜃氣
初收與清光而激射雲信無心而舒卷海寧有

志於潮汐彼則澄源紀地此乃泛跡流天影觸
浪以時動形隨風而屢遷入洪波而並曜對綠
水而相鮮時維孤嶼水朗長汀雲淨辨宮闕於
三山總妍華于一鏡臨瓊樹而昭晰覆瑤臺而
縈映鳥頡頏以追飛魚從容以涵泳莫不各得
其適咸悅乎性登夫爽塏望茲雲海雲則連錦
霞以離披海則蓄玫瑰之翠彩色莫尚乎潔白
歲何芳于首春惟春色也嘉夫藻麗惟白雲也
賞以清貞可臨流於是日縱觀美於斯辰彼美

之子顧曰無倫揚桂檝棹青蘋心遙遙于極浦
望遠遠乎通津雲兮片玉之人

續集

重建環秀橋

國朝

徐化民

遼東人
郡刺史

垂虹環秀起文宗多士經營樂與從兩岸峯巒
圍雉堞一溪烟雨隱蛟龍雲連遠岫光相接洞
鎖長流勢欲衝自此不須橫野渡杏園春色步
芳踪

遊三海巖

陳王前

固原人
郡司馬

遙看翠色半天環，疊疊層層盡是山。
龍踞洞深潛歲月，泉衝崖豁響潺湲。
雲霞影向空中落，鐘鼓聲從石裏還。
回首暮煙凝紫岱，牧童橫笛轉坡間。

中秋後三日宴海角亭

張偉

山東人廉營總兵

海峯環勝鎖天閒，此日潮平落照間。
野鳥避人鳴樹杪，晚霞展畫掛溪灣。
樓頭鼓盡嫌籌短，寺裏杯長達曙還。
莫道故鄉風景異，月明一樣滿湖山。

湖山

九日遊東山寺

陳王前

疎林落葉冷秋江擬向東山度小杠
禪徑悠悠松菊靜梵音寂寂虎龍降
晴光萬壑開明鏡晚照千峯入暮牕
不是閑人難得到空庭鶴影自
雙雙

遊仙人橋

林有聲

蘇州人
郡經歷

徘徊橋畔樹撐天峭壁懸崖鎖翠烟
百道流泉灣幾曲一犁春雨過前川
乘槎夜泛歸何處對奕閒評傍水邊
洞口花開迷釣艇桃源咫尺暫

畱連

送別張邑侯

諱應科

裴

玠

合浦明經

七年宰浦地雨化足千秋花滿香猶在琴清韻
自悠春風隨馬首柳眼送仙舟作別從來有無
如此泪流

行海派

李化龍

北直人廉營遊擊

潮汐一何驟滄桑彈指更波臣偏有信神禹計
難平樹向濤間出人從海底行石浮疑湧浪風
雨半天橫

遊仙人橋

張之英

直隸人廉
營守備

異石凌空嵌危橋望裏懸幽深不可到奇突似
將顛泉韻和松籟山光雜紫烟偶來訪仙客直
待月明還

傘塘垂釣

尚圖麟

萊陽人
合浦丞

初夏炎威徧海疆一鞭遙指憇修篁山中綠滿
松千樹嶺脚魚藏水一方漱石眠雲消永晝敲
針斫竹釣滄浪烹鮮正好邀明月對影三人共
舉觴